

經籍典第三百四十五卷

經學部傳經名儒列傳十九

宋一 張昭

按宋史張昭傳昭父直字潛夫本名昭遠避漢祖諱止稱昭常山王耳之後世居濮州范縣祖楚平壽張令楚平生直卽昭父也直以周易春秋教授學者自遠而至時號逍遙先生昭始七歲能誦古樂府詠史詩百餘篇未冠徧讀九經盡通其義處儕類中緩步闊視以爲馬鄭不己若也後至贊皇遇程生者專史學以爲專究經旨不通今古率多拘滯繁而寡要若極談王霸經緯治亂非史不可因出班范漢書十餘義商確乃授昭荀紀國志等後又盡得十三史五七年間能馳騁上下數千百年事又注十代興亡論攜文數十軸謁興唐尹張憲憲家富文籍每與昭燕語講論經史要事恨相見之晚卽署府推官同光初授眞秩加監察御史後唐天成三年以武王莊宗實錄未修詔正國節度盧質西川節度何瓚祕書監韓彥輝續錄事迹瓚上言昭有史才嘗私撰同光實錄十二卷又聞其欲撰三祖志并藏昭宗朝賜武皇制詔誥九十餘篇請以昭所撰送史館拜昭爲左補闕史館修

撰委之撰錄昭以懿祖獻祖太祖並不踐帝位仍補爲紀年錄二十卷又撰莊宗實錄三十卷上之四年上武王以來功臣列傳三十卷以本官知制誥清泰二年召判史館兼點閱三館書籍校正添補預修明宗實錄成三十卷以獻天福五年以唐史未成詔與呂琦崔悅等續成之別置史館命昭兼判院事昭又撰唐朝君臣正論二十五卷上之開運二年秋唐書成二百卷乾祐二年加檢校禮部尙書少帝年十九猶有童心昭上言請聽政之暇數召儒臣講論經義周廣順初拜戶部尙書顯德元年遷兵部尙書二年詔撰制旨兵法十卷又撰周祖實錄三十卷及梁郢王均帝後唐閔帝廢帝漢隱帝五朝實錄梁二主年祀寢遠事皆遺失遂不克修餘三帝實錄皆藏史閣詔令詳定經典釋文九經文字制科條式及問六聖所出并議三禮圖祭玉文鼎釜等昭援引經據時稱其該博恭帝卽位封舒國公宋初拜吏部尙書乾德元年郊祀昭爲鹵簿使奏復宮闕廟門郊壇夜警晨嚴之制進封鄭國公以本官致仕改封陳國公昭博通學術書無不覽兼善天文風角太一卜相兵法釋老之說藏書數萬卷尤好纂述自唐晉至宋專筆削典章之任著嘉善集五十卷名臣事迹五卷子乘圖進士及第秉謙至尙書郎

劉熙古

按宋史劉熙古傳熙古字義淳宋州寧陵人祖寶進嘗爲汝陰令熙古年十五通易詩書十九通春秋子史避祖諱不舉進士後唐長興中以三傳舉時翰林學士和凝掌貢舉熙古獻春秋極論二篇演論三篇凝甚嘉賞召與進士試擢第遂館於門下太祖卽位召爲左諫議大夫乾德六年拜端明殿學士開寶五年詔以本官參知政事拜戶部尙書致仕九年卒熙古兼通陰陽象緯之術作續聿斯歌一卷六壬釋卦序例一卷集古今事迹爲歷代紀要十五卷頗精小學作切韻拾玉二篇摹刻以獻詔付國子監頒行之子蒙叟好學著甲子五運編年曆三卷

李維

按宋史李沆傳弟維字仲方第進士爲保信軍節度推官真宗初擢直集賢院以沆相避知欽州至都興學會歲時行鄉射之禮沆沒入爲翰林學士仁宗初再遷爲尙書左丞兼侍讀學士預修真宗實錄遷工部尙書出知陳州卒維博學少以文章知名至老手不廢書景德以後巡幸四方典章名物多維所參定嘗定七經正義修續通典冊府元龜景德元年贈尙書右僕射

賈昌朝

按宋史賈昌朝傳昌朝字子明真定獲鹿人晉史官緯之從曾孫也天禧初真宗召試賜同進士出身除國子監說書孫奭判監獨稱昌朝講說有師法他日書路隨韋處厚傳示昌朝曰君當以經術進如二公奭侍讀禁中以老辭薦昌朝自代召試中書上言禮母之諱不出於宮今章獻太后易月制除猶諱父名非尊宗廟也詔從之景祐中置崇政殿說書以授昌朝誦說明白帝多所質問昌朝請記錄以進賜名邇英延義記注加直集賢院太平興國寺災是夕大雨震雷朝廷議修復昌朝上言易震之象曰洊雷震君子以恐懼修省近年寺觀屢災此殆天示警告可勿繕治以示畏天愛人之意悉行其言天章閣置侍講亦首命昌朝累遷尚書禮部郎中慶曆三年以工部侍郎拜同中書門下平章事集賢殿大學士母喪去位服除判許州召對邇英閣帝問乾卦昌朝上奏曰乾之上九稱亢龍有悔悔者凶災之萌爻在亢極必有凶災不言凶而言悔者以悔有可凶可吉之義修德則免悔而獲吉矣用九見羣龍無首吉聖人用剛健之德乃可決萬機天下久盛柔不可以濟然亢而過剛又不能久獨聖人外以剛健決事內以謙恭應物不敢自矜爲天下首乃吉也手詔優答治平

元年以待中守許州力辭弗許明年以疾留京師乃以左僕射觀文殿大學士判尙書都省卒年六十八諡曰文元御書墓碑曰大儒元老之碑所著羣經音辨百二十二卷

馮元

按宋史馮元傳元字道宗父邠入朝爲保章正元幼從崔頤正孫奭爲五經大義與樂安孫質吳陸參譙夏侯圭善羣居講學或達旦不寢號四友進士中第授江陰尉時詔流內銓取明經者補學官元自薦通五經謝泌曰古治一經或至皓首子尙少能盡通耶對曰達者一以貫之更問疑義辨析無滯補國子監講書遷大理評事擢崇文院檢討兼國子監直講王旦聞其名嘗令說論語老子羣子弟侍聽因薦之眞宗試進士殿中召元講易元進說曰地天爲泰者以天地之氣交也君道至尊臣道至卑惟上下相與則可以輔相天地財成萬化帝悅遷太子中允直龍圖閣詔預內朝天禧初數與查道李虛己李行簡入講易於宣和門北閣遷太常丞兼判禮部吏部南曹皇子爲壽春郡王王旦又薦元宜講經資善堂擢左正言兼太子右諭德仁宗卽位遷直學士兼侍講與孫奭以經術並進講論自是仁宗益嚮學進龍圖閣學士明道元年遷禮部侍郎復判禮院國子監上金華五箴

賜書褒答修景祐廣樂記書成遷戶部侍郎卒贈本部尙書諡章靖元性簡厚執親喪自括髮至祥練皆案禮變服遇祭日與門生對坐誦說孝經尤精易初七歲方讀易母夜夢異人以紺蓮華與元吞之且曰善讀此後必貴顯元且老率三日一誦易

楊安國

按宋史楊安國傳安國字君倚密州安丘人父光輔居馬耆山學者多從受經州守王博文薦爲太學助教孫奭知兗州又薦爲太常寺奉禮郎州學講書旣而奭與馮元薦安國爲國子監直講并召光輔至仁宗命說尙書光輔曰堯舜之事遠而未易行願講無逸一篇時年七十餘矣而論說明暢帝悅欲留爲學官固辭以國子監丞老於家安國五經及第爲枝江縣尉後遷大理寺丞光輔教授兗州請監兗州酒稅徙監益州糧料院入爲國子監直講景祐初置崇政殿說書安國以國子博士預選久之進天章閣侍講直龍圖閣遂爲天章閣待制龍圖閣直學士皆兼侍講進翰林侍講學士歷判尙書刑部太常寺糾察在京刑獄累遷給事中年七十餘卒贈尙書禮部侍郎安國講說一以注疏爲主無他發明引喻鄙俚世或傳以爲笑尤喜緯書及注疏所引緯書則尊之與經等在經筵

二十七年仁宗稱其行義淳質以比先朝崔遵度嘗講易至鼎卦帝問九四象如何安國對九四上承至尊下應初爻任重非據故折足覆餗亦猶任得其人則雖重可勝非其人必有顛覆之患帝稱善又嘗講周官至大荒大札則薄征緩刑因進言曰古所謂緩刑乃寬過誤之民爾今衆持兵仗取民廩食一切寬之恐無以禁姦帝曰不然天下皆吾赤子迫於餓莩至起爲盜州縣旣不能振恤乃捕而殺之不亦甚乎嘗請書無逸篇於邇英閣之後屏帝曰朕不欲背聖人之言命蔡襄書無逸王洙書孝經四章列置左右

范仲淹

按宋史范仲淹傳仲淹字希文唐宰相履冰之後也舉進士第爲祕閣校理仲淹汎通六經長於易學者多從質問爲執經講解亡所倦嘗推其奉以食四方遊士諸子至易衣而出仲淹晏如也每感激論天下事奮不顧身一時士大夫矯厲尙風節自仲淹倡之天聖七年通判河中府仁宗以爲忠召爲右司諫拜樞密副使諫官歐陽修等言仲淹有相材改叅知政事帝方銳意太平數問當世事再賜手詔又爲之開天章閣召二府條對仲淹退而上十事天子悉采用之初仲淹以忤呂夷簡放

逐者數年及夷簡罷召還倚以爲治中外想望其功業而仲淹以天下爲己任裁削官吏多所舉劾僥倖者不便於是謗毀稍行而朋黨之論浸聞上矣富弼請行邊仲淹亦請罷政事迺以資政殿學士知邠州以疾請鄧州再遷戶部侍郎徙青州卒年六十四贈兵部尚書諡文正帝親書其碑曰褒賢之碑仲淹內剛外和性至孝以母在時方貧其後雖貴非賓客不重肉妻子衣食僅能自充而好施予置義庄里中以贍族人汎愛樂善士多出其門下雖里巷之人皆能道其名字死之日四方聞者皆爲歎息爲政尙忠厚所至有恩邠慶二州之民與屬羌皆畫像立生祠事之及其卒也羌酋數百人哭之如父齋三日而去

范純仁

按宋史范純仁傳純仁字堯夫資警悟八歲能講所授書中皇祐元年進士第調知武進縣以遠親不赴易長葛又不往仲淹曰汝昔日以遠爲言今近矣復何辭純仁曰豈可重於祿食而輕去父母邪雖近亦不能遂養焉仲淹門下多賢士如胡瑗孫復石介李覲之徒純仁皆與從遊晝夜肄業至夜分不寢置燈帳中帳頂如墨色仲淹沒始出仕以著作佐郎知襄城縣治平中召爲侍御史後同

知諫院奏言王安石變祖宗法度掊克財利民心不寧書曰怨豈在明不見是圖願陛下圖不見之
怨神宗曰何謂不見之怨對曰杜牧所謂天下之人不敢言而敢怒也神宗嘉納之曰卿善論事宜
爲朕條古今治亂可爲監戒者乃作尙書解以進曰其言皆堯舜禹湯文武之事也治天下無以易
此願深究而力行之加直集賢院同修起居注求退安石不聽遂求罷諫職改判國子監其所上章
疏語多激切神宗悉不付外純仁盡錄中中書安石大怒乞加重貶神宗曰彼無罪命知河中府加
直龍圖閣知慶州哲宗立召爲右諫議大夫除給事中元祐初進吏部尙書三年拜尙書右僕射兼
中書侍郎忤章惇意落職知隨州徽宗卽位卽日除右正議大夫純仁乞歸徽宗不得已許之每見
輔臣問安否乃曰范純仁得一識面足矣建中靖國改元之明日熟寐而卒年七十五贈開府儀同
三司諡曰忠宣御書碑額曰世濟忠直之碑純仁性夷易寬簡自爲布衣至宰相廉儉如一嘗曰吾
生平所學得之忠恕二字一生用不盡每戒子弟曰人雖至愚責人則明雖有聰明恕己則昏苟能
以責人之心責己恕己之心恕人不患不至聖賢地位也又戒曰六經聖人之事也知一字則行一
字要須造次顛沛必於是則所謂有爲者亦若是爾豈不在人邪

劉敞

按宋史劉敞傳敞字原父臨江新喻人舉慶曆進士第二直集賢院判尙書考功擢知制誥拜翰林侍讀學士敞侍英宗講讀每指事據經因以諷諫時兩宮方有小人間言諫者或許而過直敞進讀史記至堯授舜以天下拱而言曰舜至側微也堯禪之以位天地享之百姓戴之非有他道惟孝友之德光於上下耳帝竦體改容知其以義理諷也皇太后聞之亦大喜改集賢院學士判南京御史臺熙寧元年卒年五十敞學問淵博自佛老卜筮天文方藥山經地志皆究知大略朝廷每有禮樂之事必就以取決焉歐陽修每於書有疑折簡來問對其使揮筆答之不停手修服其博長於春秋爲書四十卷行於世

劉彝

按宋史劉彝傳彝字執中福州人幼介特居鄉以行義稱從胡瑗學瑗稱其善治水凡所立綱紀規式彝力居多第進士爲邵武尉神宗擇水官以彝悉東南水利除都水丞加直史館知桂州元祐初卒年七十著七經中義百七十卷

呂公著

按宋史呂公著傳公著字晦叔幼嗜學至忘寢食父夷簡器異之曰他日必爲公輔登進士第通判
潁州郡守歐陽修與爲講學之友除崇文院檢討進知制誥三辭不拜改天章閣待制兼侍讀英宗
親政加龍圖閣直學士出知蔡州神宗立召爲翰林學士知通進銀臺司熙寧初知開封府時夏秋
淫雨京師地震公著上疏曰自昔人君遇災或恐懼以致福或簡誣以致禍惟君人者去偏聽獨任
之弊而不主先入之語則不爲邪說所亂顏淵問爲邦孔子以遠佞人爲戒蓋佞人惟恐不合於君
則其勢易親正人惟恐不合於義則其勢易疎惟先格王正厥事未有事正而世不治者也二年爲
御史中丞時王安石方行青苗法公著極言不可安石怒誣以惡語出知潁州八年彗星見詔求直
言公著上疏曰陛下於人材旣反覆不常則於政事亦乖戾不審古之爲政初不信於民者有之若
子產治鄭一年而人怨之三年而人歌之陛下垂拱仰成七年於此然輿人之誦亦未有異於前日
陛下獨不察乎起翰林學士承旨改端明殿學士知審官院帝從容與論治道遂及釋老公著問曰
堯舜知此道乎帝曰堯舜豈不知公著曰堯舜雖知此而惟以知人安民爲難所以爲堯舜也未幾

同知樞密院事元豐五年以疾丐去位將立太子帝謂輔臣當以呂公著司馬光爲師傅哲宗卽位以侍讀還朝拜尙書左丞門下侍郎元祐元年拜尙書右僕射兼中書侍郎與司馬光同心輔政推本先帝之志凡欲革而未暇與革而未定者舉行之科舉專用王安石經義且雜以釋氏之說凡士子至不誦正經惟竊安石之書以干進精熟者博上第故科舉益弊公著始令禁主司不得出題老莊書舉子不得以申韓佛書爲學經義參用古今諸儒說毋得專取王氏復賢良方正科集所講書要語明白切於治道者凡百篇進之以備游意翰墨爲聖學之助三年懇辭位拜司空同平章軍國事明年薨年七十贈太師申國公諡曰正獻御書碑首曰純誠厚德公著自少講學卽以治心養性爲本於講說尤精語約而理盡司馬光曰每聞晦叔講便覺己語爲煩其爲名流所敬如此

呂希哲

按宋史呂公著傳子希哲字原明少從焦千之孫復石介胡璩學復從程顥程頤張載遊聞見由是益廣以廕入官公著作相二弟已官省寺希哲獨滯管庫久乃判登聞鼓院力辭公著歎曰當世善士吾收拾略盡爾獨以吾故置不試命也夫希哲母賢明有法度聞公著言笑曰是亦未知其子矣

終公著喪始爲兵部員外郎范祖禹言於哲宗曰希哲經術操行宜備勸講其父嘗稱爲不欺暗室詔以爲崇政殿說書其勸導人主以修身爲本修身以正心誠意爲主其言曰心正意誠則身修而天下化若身不能修雖左右之人且不能諭況天下乎擢右司諫徽宗初以直祕閣知曹州旋遭崇寧黨禍奪職爲宮祠驛寓淮泗間十餘年卒希哲樂易簡儉有至行晚年名益重遠近皆師尊之

范祖禹

按宋史范鎮傳鎮從孫祖禹字淳甫一字夢得其生也母夢一偉丈夫被金甲入寢室曰吾漢將軍鄧禹旣寤猶見之遂以爲名幼孤叔祖鎮撫育如己子祖禹自以旣孤每歲時親賓慶集慘怛若無所容閉門讀書未嘗預人事旣至京師所與交游皆一時聞人鎮器之曰此兒天下士也進士甲科從司馬光編修資治通鑑在洛十五年不事進取書成光薦爲祕書省正字神宗崩祖禹上疏論喪服之制曰先王制禮君服同於父皆斬衰三年蓋恐爲人臣者不以父事其君自漢以來不惟人臣無服人君遂不爲三年之喪國朝自祖宗以來外廷雖用易月之制宮中實行三年服君服如古典而臣下猶依漢制故十二日而小祥朞而又小祥二十四日而大祥再朞而又大祥旣以日爲之又

以月爲之此禮之無據者也古者再朞而大祥中月而禫禫祭之名非服之色今乃爲之慘服三日然後禫此禮之不經者也服既除至葬又服之耐廟後卽吉纔八月而遽純吉無所不佩此又禮之無漸者也朔望羣臣朝服以造殯宮是以吉服臨喪人主衰服在上是以先帝之服爲人主之私喪此二者皆禮之所不安也哲宗立遷著作郎兼侍講神宗旣祥祖禹上疏宣仁后曰今卽吉方始服御一新奢儉之端皆由此起願崇儉敦朴輔養聖性使目不視靡曼之色耳不聽淫哇之聲非禮勿言非禮勿動則學問日益聖德日隆此宗社無疆之福故事除服當開樂置宴祖禹以爲因除服而開樂設宴則似除服而慶賀非君子不得已而除之之意不可拜諫議大夫首上疏論人主正心修身之要遷給事中爲禮部侍郎拜翰林學士范氏自鎮至祖禹比三世居禁林士論榮慕時紹述之論已興有相章惇意祖禹力言惇不可用不見從遂請外乃以龍圖閣學士知陝州言者論祖禹修實錄詆誣貶武安軍節度副使昭州別駕安置永州賀州又徙賓化而卒年五十八祖禹平居恂恂口不言人過至遇事則別白是非不少借隱在邇英守經據正獻納尤多嘗講尙書至內作色荒外作禽荒大語拱手再誦却立云願陛下留聽帝首肯再三乃退每當講前夕必正衣冠儼如在上側

命子弟侍先按講其說開列古義參之時事言簡而當無一長語義理明白粲然成文蘇軾稱爲講官第一

蘇軾

按宋史蘇軾傳軾字子瞻眉州眉山人生十年父洵游學四方母程氏親授以書聞古今成敗輒能語其要程氏讀東漢范滂傳慨然太息軾請曰軾若爲滂母許之否乎程氏曰汝能爲滂吾顧不能爲滂母邪比冠博通經史屬文日數千言嘉祐二年試禮部方時文磔裂詭異之弊勝主司歐陽修思有以救之得軾刑賞忠厚論驚喜欲擢冠多士猶疑其客曾鞏所爲置第二復以春秋對義居第一殿試中乙科除大理評事簽書鳳翔府判官治平二年入判登聞鼓院直史館熙寧二年王安石執政素惡其議異己以判官告院四年安石欲變科舉興學校詔兩制三館議軾上議曰今所欲改變不過數端或曰鄉舉德行而略文詞或曰專取策論而罷詩賦或欲兼采譽望而罷牘封或欲經生不帖墨而考大義此皆知其一不知其二者也願陛下留意於遠者大者區區之法何預焉臣又切有私憂過計者夫性命之說自子貢不得聞而今之學者恥不言性命讀其文浩然無當而不可

窮觀其貌超然無著而不可挹此豈真能然哉蓋中人之性安於放而樂於誕耳陛下亦安用之議上神宗悟曰吾固疑此得軾議意釋然矣安石不悅命權開封府推官時安石創行新法軾上書論其不便軾見安石贊神宗以獨斷專任因試進士發策以晉武平吳以獨斷而克苻堅伐晉以獨斷而亡齊桓專任管仲而霸燕噲專任子之而敗事同而功異爲問安石滋怒軾遂請外通判杭州徙知湖州上表以謝又以事不便民者不敢言以詩托諷庶有補於國御史媒孽所爲詩以爲訕謗欲寘之死神宗獨憐之以黃州團練副使安置軾與田父野老相從溪山間築室於東坡自號東坡居士三年神宗以國史至重命蘇軾成之遂手札移軾汝州哲宗立召爲禮部郎中尋除翰林學士二年兼侍讀每進讀至治亂興衰邪正得失之際未嘗不反覆開導觀有所啟悟哲宗雖恭默不言輒首肯之遷禮部兼端明殿翰林侍讀兩學士爲禮部尙書高麗遣使請書朝廷以故事盡許之軾曰漢東平王請諸子及太史公書猶不肯予今高麗所請有甚於此其可予乎不聽紹聖初御史論軾掌內外制日所作詞命以爲譏斥先朝貶竄軍節度副使惠州安置又貶瓊州別駕居昌化買地築室僱人運甓畚土以助之獨與幼子過處著書以爲樂建中靖國元年卒於常州年六十六父洵